

鄆陵縣志

第一冊
卷首 聖製
卷一 輿地志
卷二 建置志
卷三 河渠志

漢書門
九〇八五
一〇八五
八册架函號類

九〇八五
二九二
一七三

地理

共八本


內閣文庫
番號 漢 9085
冊數 8 (1)
函號 292 113

292-113



重修鄆陵縣志序

鄆陵見于春秋隱公時而設縣則自漢始
且大邑焉攷漢制邑不滿萬戶則設長萬
戶以上則置令有丞簿尉爲之貳後漢宋
齊傳永建初西河太守宋漢子則爲鄆陵
令雖時代遷移沿革不一然其爲古邑也
明矣夫邑古則輿地之建置必多人物之
盛衰不一綱紀之鋪張利病之興替宜詳



馬邑縣志
宜畧者何若卽細而閭閻情狀物產纖微者又何若述事紀言昭文獻于一時而垂勸懲于來禩者胥于是乎在然則志之作豈具文也乎哉鄆陵志昉于前明孫令讚邑人尚書劉氏訢增訂成完書然其中紕繆實繁

國朝順治間孫令丕承曾與邑紳士踵修而莫能改正且百數十年之事闕焉未補

我

國家幅員數萬里統志之修編行直省上之職方氏者已歷有年苟臨古邑而無以供輶軒之採得非爲政者之耻乎今施令乃能于視政之暇慨然起而修之補其闕正其繆簡嚴詳慎備有史法展卷燦若列燿其真有功于邑也歟間嘗讀漢書至稱宋則爲在鄆多名迹寰宇記復載治內

有宋元矩祠夫則之于今邈矣而史冊班班可考如此然後知循吏之為可貴也施令其勉之哉

乾隆三十七年歲次壬辰小春穀旦撫豫使者山陰何焯撰

鄆陵縣志序

薛

瑄

寄籍鄆陵

郡邑之有志尚矣任土作貢見于夏書九州之士九野之星掌之周職方保章氏自漢以來作史者亦皆有志以載當時之士宇雖郡邑之名或仍或革至于上則天文下因地理區宇一定之宜則有非私智所能改易也我皇明肇一四方極海內外畢載圖籍幅員之廣前未之有也皇上臨御之十六年爰命天下儒臣考郡縣廢置之由與夫山川風土之類編集以進于時鄆陵司訓王惟善實修縣志奉命惟謹乃摘抉經史詢訊故老據

遺事于剗碑斷石之間訪陳迹于荒墟廢址之內彼此更定其是非古今互求其實迹提綱舉目細大不遺凡邑之肇置本末與夫分野所屬山川所表溝池土地之綿歷戶籍貢賦之盈縮風俗土產之宜宦蹟人物之衆縣治庠序壇墀郵傳翔建之始僧寺祠觀橋梁陂池存毀之迹仙釋之有無文士之題詠靡不博采而備錄之再閱月始克成編乃繕寫爲帙上之朝復將鈐板邑庠傳之永久遂屬余序余謂蘭亭之會茂林修竹崇山峻嶺遊觀之樂耳好事者猶圖而記之以傳于後况茲一

邑之志有稽于古有考于今其可尼而不傳哉是書也俾邑之人觀其山川景物則堅其安土樂業之心觀夫忠良孝義則興其去惡向善之志是又豈非政教之一助哉是爲序

右鄆陵縣舊志序前明薛文清先生所作也歲壬辰余令鄆陵修邑志覓先生文集不得僅從別集中採錄一二詩文而已越十月書成余旋以攝信陽州牧去民事匆匆無暇重理卷帙乙未秋余奉命移守河南時值清暇民人和悅復有事於郡乘廣蒐

載籍適文清後裔有抱其先集來者翻閱之始得此序迺知鄆志肇自王惟善先生前志四修無一語及之不賴此序何由知先生草創之苦心乎爲之狂喜者累日轉以曩時疎忽未及表揚爲可愧也爰付梓人仍歸其板於鄆以補前事之闕豈特爲邑乘之光已哉王先生名賢字惟善寧陽人累官至巡撫盖與文清先生之父同官於鄆賢而能文者焉丁酉清和月會稽施誠識於河南郡齋

重修鄆陵縣志序

國家久道化成車書一統聲教訖於四海凡在臣庶無不爭自濯磨共奮於文明之世稱極盛矣誠不材承乏茲土嘗兢兢以不克稱職爲懼下車之始首閱邑乘知纂自順治己亥歷今百有十四年爲之懼然者久之夫志者一邑之權輿也觀疆域之分合則知綢繆之貴豫考戶口之多寡則知休養之宜先風化之或淳或漓則知張弛調劑之弗可緩賦役之爲盈爲絀則知催科撫字之當加意按列傳綜藝文而知文獻之所關非細至

于求故實而悉制作之由稽宦跡而深仰止之慕一編之中罔勿備焉志之作不綦重哉然志輿地不詳沿革其失也混志建置不攷歲月其失也踈田賦瑣贅于前明恩綸全編夫闔邑金石不著炎漢選舉止及李唐采人物每近于誣彙藝文又虞其冗此皆前志之謬與缺者又不可不急爲補正者也方欲謀諸紳士期襄厥役而一時咸踴躍以重修請爰取舊志而更新之創立義例稽經據史釐爲二十二卷自地理以至雜志各因類附入條分縷析綱舉目張閱十月而書成誠不材不敢

自信爲善本然矢公矢慎無一毫私意低昂于其間實可以質鬼神而貽來者區區此心藉以仰答

聖朝作人雅化竊附于輶軒之末云爾而謂以文字飾吏治則誠滋愧矣

乾隆三十七年歲在壬辰十月旣望鄢陵縣知縣會稽施誠序

鄢陵縣志舊序

正德四年

邑令

孫

讚

高郵人

予始承乏鄢陵輒求志以考夫諸所當知既得乃寫本
 簡編斷缺文字譌謬竊病焉銳欲修之顧方災傷招亡
 納附築防積廩百務叢委幾三載矣乃稍咨詢檢閱然
 科徵牒訟日復擾擾卒為所奪何及也近始編輯託學
 諭馬君九萬校正予乃考滿北上會故友中書陳君廷
 器適解館職遂偕以南小兒繩已為馬君謄寫三四風
 葉之喻庶乎免矣復累陳君以書然雖欠精確而頗脫
 冗謬繼予合此者高明博雅之士或復有改定焉則此

何妨以覆瓿哉

鄢陵縣志舊序

正德四年

和春

河陰人

鄢陵古邑也觀風問俗尋幽弔古之士必至焉然舊志不修諸建置沿革疆域廣狹山川名勝賢哲墓祠以至人物盛衰仕隱顯晦俗尚淳漓戶口增損利病興除之類欲考則無徵于問則無對必求夫質而不俚簡而不漏確乎其可信者幾無所取是則非志之不修修志有不易焉者爾高郵孫侯治鄢五年庶政咸通修舊起廢乃考諸史傳而詳其建置訪諸遺老而得其墓祠因諸

巡行而觀其疆域山川徵諸文獻而知其人物仕隱若夫俗尚戶口利病則據父老簿書而悉也他如彭祖之說則削其荒唐甘羅之傳則正其謬誤明確者彰其所必信悠眇者闕其所可疑略文詞而尚事實尊史傳而黜口語觀風問俗尋幽弔古必有所取焉然則非鄢陵之盛舉哉侯名讚字文美修職類修志而廉謹平恕為時邑侯冠云

修鄢陵縣志舊序

嘉靖十六年

劉訥

邑人

鄢舊無志成化初一師儒始圖編輯其徒守之者損益

舊序

進黜多迂遠之與愛憎君子謂其無義例有同簿書者
正德間高郵孫大夫刻河陰和太齡序今垂二紀餘板
脫字磨滅矣予在告日有觀風使過訪者曰志史類也
以事爲體以文貫篇以義立例事不備奚紀文不足奚
傳義不精奚訓鄆志若是子盍修諸予唯而告姻友澹
亭陳子三源胡子因考世家以論人物卽名實以核是
非澹亭曰事宗史義法春秋願盡出簡冊資詮次三源
曰太齡氏序有法例而編輯者未用其待子乎遂不敢
以不文辭編八志分繫五十餘類列序以引端錄見以

附類稿成求正于研岡杜公辱弁序焉會蜀前溪史君
來令鄆推學飭政率德導民受志讀之慨然許刻梓無
何以憂去丙申三月予終制挾稿入京今令楚育峰曾
君亦重是舉書抵予曰都人士書法刊式罔不良願捐
俸以助刻論于研岡三源咸避之乃託中舍陳汝忠校
讐填先公諱計資簡工刻于京維茲史事媿予非才幸
贊成于諸公釋遺歉于累歲自今伊始邑有乘罔俾熊
軾俛而求諸野續見聞者尙亦不墜哉

三修鄆陵縣志舊序

順治七年

邑令

孫丕承

瀋陽人

舊序

夫邑之有志猶國之有史也徵文考獻捃摭今昔所以紀疆域之廣狹山川之形勢建置之沿革土地之肥磽賦役之損益風俗之美惡吏治之污隆科名之盛衰人物之淑慝古蹟之存毀祥異之昭示藝文之修廢典綦重矣

今皇帝御極之五年戊子春余奉

命治鄴海寓新造事多草創欲得邑志一考掌故而板燬于寇竟不可得因就訪于鄭潛庵先生爰出舊志二司相示蓋前司寇劉公本也歲年久遠字畫磨滅半不

可識且上下百二十年事變屢更卽舊志所載揆之于今已多不合况其它乎每思蒐羅續輯成書以垂令則會土木之役漸費營綜未遑猝辦庚寅九月乃延梁子更生梁子幼宣韓子叔夜劉子博仲鄭子道旋商確義例開局分纂相戒布筆寧覈無襲寧約無濫立法貴嚴宅心宜恕俾一邑利弊歷代典章燦然可觀閱六十日乃竣厥役余反覆展視旣條分而縷析亦彰往以勸來比于舊志頗爲詳備洵諸子之盛烈一邑之良史矣因遣役趨金陵鏤板貯之邑庫後之君子軫念民隱尙論

進詰當必有欣然于此編者矣

四修鄆陵縣志舊序

順治十六年

朱廷瑞

歙縣人

國之史家之乘與郡邑之志一也而郡邑之志恒難言之何也帝王當代必有起居之注有實錄之修即開草之餘亦必命儒臣以輯前史至家有賢子孫類能纂其譜系以為前人光其事蓋有任之者也郡邑之志則不然其地非有賢縉紳大夫不修也即有之而非博綜舊聞則才不足以任不修也才足以任而無其志不修也若夫墨綬之長奉法競競簿書期會間苟幸無訾三年

遷一官足矣豈其俛首汗青更謀千古事哉况于節鉞重臣機務孔殷不遑及此抑亦其勢然矣順治十五年春曲沃賈公以大司馬出撫兩河政未期而吏恪于官士靜于伍氓謠于衢八郡提封數千里廓如也于是自公多暇注意文獻之傳謂中州古號名區紀載闕焉何以示後乃遍檄諸郡邑曰其各修若志以來而鄆陵令經起鵬亦踵修其邑志將以獻之賈公而求予言弁之予維鄆陵雖百里乎其名首著于春秋而地亦代多高賢出焉陳仲弓之德化薛文清之遺烈猶有存乎其或

山川之疆域政治之沿革人材風俗之汗隆尤皆不可
以無紀者前志創始于高郵孫令與大司寇劉公
國朝定鼎重纂之者則三韓孫令也今經令乃奉賈公
集諸縉紳大夫而更修之典章蔚然有倫有脊不特鄆
之人士珍而藏之比諸家乘將直指李公採其副函上
之

御府國史實權輿之予於是知賈公之爲功于兩河卽
鄆亦藉之以不朽也然令亦可謂敏而文矣客冬予行
部南陽郡守以所修志諭予時予有天中之役未遑泚

筆于簡端茲以校士事竣弭節于鄆旣樂賈公之功而
復嘉令之克副公意也遂弁數言以爲之序

四修鄆陵縣志舊序

順治十六年

邑令

經起鵬
臨川人

鄆志肇始於前令孫君繼修於大司寇劉公明末版燬
興朝之七年三韓孫君延邑之名彥搜輯舊章網羅散
軼復修之閱五年而鵬受事于茲又三年己亥夏撫軍
部臺檄郡邑咸新厥志于是取前刻更爲增訂而總其
成於博仲劉君義例哀次悉本諸君手定鵬未敢一字
損益其間蓋詢之故老公之國人之義不敢貪功以爲

舊序

已力也夫既得藉以報憲命又因之以傳不朽豈非幸哉

四修鄢陵縣志舊序

順治十六年

劉佑 邑人

志史類也上自星野疆域山川城隍之屬而下及于草木物產之細數千年守令之治績與人物之盛衰風俗之隆替田賦戶口之增減生民之利病休戚莫不畢載志之爲書誠重矣哉鄢陵僻處大梁之南自有周建邑歷秦漢魏晉隋唐宋元明以至于今雖城垣有遷徙幅員有廣狹命名亦間有因革然歷代以來莫之或廢也

其間人文之盛事蹟之繁不可一二遽數使非載諸簡策傳之後禳將恐世遠人湮其泯沒而不彰者多矣皇上御極十有五年少司馬曲沃賈公巡撫河南八郡之人舊所不便及所願欲而不得者公至之日皆罷行之春溫秋肅風馳電掣曾未期月而吏安其職民樂其業伍無老弱冗食之兵境無穿窬竊發之盜大河南北千有餘里熙熙然稱至治之世矣于是修舉廢墜潤色太平當寇氛煨燼之餘載籍不存故實莫考用是移檄郡縣俾各纂梓以備覽觀公之用心何其盛哉夫輿志

之重如彼公之用心又如此纂述之任稱極難矣而經
侯獨以屬之家君子蓋慎之重之也粵稽鄆志自高郵
孫侯創始以來其後相繼編輯者逮今而四始則先大
司寇分門別類哀然成帙壽之梨棗多歷年所繼則先
南康編年之法最為精詳惜未及付梓稿亦旋失我
朝定閏之庚寅三韓孫侯重加纂修而分任其事者則
更生幼宣叔夜公靜與家君子也今茲之役視前為鉅
而家君乃獨成之上下百有餘年吾家適三屬草焉斯
亦竒矣昔漢高帝入秦丞相何獨取其圖籍以是徧知

天下戶口阨塞之處君子以為識大體真宰相事今公
與鄆侯其意豈異邪他日入為輔相左右
天子吾知必博覽古今之遺蹟廣延天下之英材歌咏
太平垂為一經郁郁乎文治之隆軼漢唐而上之矣又
寧第中州諸志足垂不朽已哉是為序

四修鄆陵縣志舊序

順治十六年

梁

熙邑人

鄆陵志創修于前代大司寇劉公

國朝順治七年邑侯三韓孫公延邑中名宿分任纂輯
具有成書逮十有六年撫軍賈公檄八郡州縣各為修

舊序

纂務使缺畧咸輯。今昔備載。邑侯經公克竣厥事。時余待臯京邸。馳示一編。繙閱既畢。慨然興曰。思深哉。茲舉乎公。以樞鈐重臣來撫兩河。當此介馬釋騷。徵兵措餉之時。撫綏振飭。方且日不暇給。而乃有餘力。修此廢墜。固公之雄才偉畧。有大過人者。然而茲舉也。謂爲旁搜遐考。備人文而標名勝。非知公也。卽謂苞舉科條。叅伍訓辭。潤舊而爲新。因畧以致詳。鴻麗典則。用以塞輶軒之問。資天祿石渠之採訪。亦未知公之心也。而公亦未肯以憂深慮遠者。自披示也。夫志之體與史同。條析雖

煩。其要在討典稽常。以告有土。質歷代之策。以決從違。述

本朝之政。以嚴率由。稱乎古。足以行于今。作乎前。可以訓于後。凡以期事有章程。吏有法守。奠安天下之大命。非徒抽笈摛管。炫博逞奇已也。况中州者。尤天下之樞筓也。北拱畿輔。東連兗鄆。南控荆吳。西扼秦晉。天下之大勢。每視乎中州之安危。而知中州之安危。惟視乎小民之肥瘠。而得則苟有切于除弊蠹。而阜民生。辨則壤而滋蕃息者。寧可目爲瑣屑。迂緩而置之度外乎。且

皇上躬親大政數年以來更張庶務申行賞罰憂憫元元勞心求治謨諸

廟堂頒之郡國者要皆於州縣核實效焉州縣之志修而後方輿備矣統紀彰矣政典陳而文獻徵俾來者可遵矣于此觀戶口之登耗可以知民牧之愛養觀南畝之蕪闢可以知田畷之勸督觀風俗之淳澆可以知秉鐸之教化觀選舉之多寡可以知提衡之振興觀山川之形勢並可以知戰守之機宜卽廣而及于古蹟臺榭典籍藝文皆可以供大夫登高作賦爲黼黻文治之助

蓋挈其本統而其餘者皆不爲無裨也此公所以苦心蒿目于民燠吏威之後輒銳思乎輿誦之所陳極意于訓方之所載乎而又得經明府以江右名儒蒞任四載惠洽民悅于是祇奉德音諮諏網羅爲能探蹟補漏正疑傳信以垂不朽夫居官者每遽廬其業誰以歲月計千百年若此永賴是營大猷是經然後知賢者果能相與以有成也

四修鄱陵縣志舊序

邑令黃雲鶴
宣城人

紀事彙物曰志揆例顯義郡已燦然可述矣余披誦低

舊序

徇竊于中有感焉何也治行欲成美先徵于風尚禍亂將作機每乘于積漸况時衍代庚天有弛張地有翕闢苟非因道裁化蚤見而力救之殆亦頽然互相傾軋而于其漸遂不可挽近仕沿資格邦邑猶蘧廬也官于謠俗之流尚始未盡察久之察矣廢置興革未及行而又倏限于任不能待特傳之汗簡爲後來者告厥有藉于志也不綦重乎匪以銅駝胸棘金盃流灰懼掌故弗存廼排纂緒聞緣飾墳索而僅體規于南董旨韞于陽秋者耶要星以步天而災祥之附會者必黜圖以辯土而

疆域之封守者必嚴表以序賢而人文之激勸者必詳
執土成賦民有惟正之供考則究慮官有協極之施貢
伊天闕比于敷奏之職方藏諸冊府等于讀法之閭史
所關於政教爲何如者哉夫治亂之大勢在民而凡民
之所以治與所以亂舉尤係于謀生之充詘天下循約
則生易厚處富則心自臧鄙雖夙稱醇沃而漸迄于茲
逐澆鶩譎食利窘感卽莫重于賦役賦因土田設也有
地則有糧然糧重而地輕役因戶口設也有身則有庸
然庸劇而身賤甚至頃地數緡額輸歲倍于價飛徭更

力憊于兼征民多逋負一值追呼輒棄家逃避冀如向
之安土重遷依依故里而不欲去者其可復得也歟有
司間與休息而督責隨之嗟乎循吏可為而實不可為
也余以催科用拙例應解綬而于志切簷簷弗倦者曷
為爾抑誌者志也書敘九邱詩列十五國以迨象器于
易儀物于禮而援事立政于春秋準古訓今是亦往聖
之志而已矣余不負所學推往聖之志以為政蓋亦欲
降流崇本振衰趨盛弛者張翕者闢官天地以權輿世
變將時至而百志興誌之所繇形也夫

鄆陵縣續志舊序

乾隆十年
修而未刻

邑令

姜

綰萬縣
人

甲子秋大方伯趙公檄修邑志云將以述往昔垂來茲
紀美惡昭法戒也余聞而喜之乃集諸生謀曰諸君亦
知修志之難乎蓋志猶史也紀事必得其詳紀人務貴
乎實然後可以信今而傳後每見近之為志者尤多妄
誕其志人也志顯宦耳次則志其一命再命之榮耳次
則志所親愛與所畏憚之人耳若居官有令名而後嗣貧
且賤則祖父之賢不著矣至單寒修士鄉閭美行更不
得犯其筆端矣嗚呼志而若是亦何貴乎是豈大方伯

舊序

修志之盛心哉邑中王子蘊秀爨子剛克王子元凱劉子紹王子芸心五人者皆讀書自好之士鄉黨所共稱者也遂以志事委之時值隆冬諸子不憚討論寒窗雪案不稍懈閱數月書成示余余反覆披覽凡所記載咸有其難其慎之意而人物一編尤為物議之叢不徇私不避嫌取之至嚴而載之至公余不禁喟然嘆曰若諸子者其真能不負厥職者哉可以信今亦可以傳後矣用是著為鄆邑續志聊書管見于簡端以報趙公且以俟後人之論定云爾

鄆陵縣志重修姓氏

鑒定

兵部侍郎鄆陵俞都御史憲撫河南兼提督節制香軍務護河道 何 焯

開 封 府 知 府 朱 岐

纂修

鄆 陵 縣 知 縣 施 誠

參訂

鄆 陵 縣 教 諭 李 光 亮

經理

姓氏

吏目管鄆陵縣典史事李恩普
採訪

翰林院典簿舉人蘇帝輔

生員梁渠

歲貢劉思敬

廩膳生王芸心

拔貢彭應光

歲貢陳兆鳳

歲貢陳東銘

廩膳生張湧

廩膳生梁英楠

生員王復性

生員劉燕祥

生員康法才

廩膳生韓士元

舉人陳遇甲

廩膳生于文運

生員侯栗

監

生 鄭濱

生

員 陳苞

監

生 常永佑

副

貢

生 張休采

廩

膳

生 常思訖

生

員 左其慎

監

生 于師渠

監

生 張嗣緒

校閱

舉

人 呂挺生

舉

人 馬敬生

生

員 呂挺瑞

董事

監

生 劉廷檢

監

生 晁新文

生

員 常作舟

候

選

主

簿 程條章

監

生 楊瓌

監

生

梁樹績

監

生

李光

監

生

李文耀

監

生

陳國松

監

生

張宗琰

候

目

龔培徵

選兵馬司吏

監

生

谷景文

生

員

李碩甫

監

生

郭殿元

縣

志

圖

輿地圖



右縣境舊圖也數百年來無更易故照舊圖之惟城
 北古岡二缺口不同蓋雙泊發源最遠夏秋陡漲夾
 泥沙而下河不能容遂至溢出近岸淤高漸遠漸窪
 其去路又為南之龍岡東之皇甫岡所扼城北一帶
 遂成巨浸冲決兩口以致鄆扶兩邑構訟不已此水
 勢使然非人力一時所能安全也

西至許州界三十五里


西




里十五界縣

輿地圖


城池圖



城池圖






文廟圖



學宮圖

四





鄆陵縣志發凡

一春秋爲諸史之祖首先春王尊一王之大統也我朝自

世祖章皇帝定鼎以來

列聖相承迄今百有數十年涵濡煦育久道化成

綸綍聿昭允爲天下萬世模楷敬法春秋之旨首志

聖製冠冕全志非徒爲一邑之光也

一志宜分綱目舊志門類冗雜無關體要且多未確
茲志分綱一十有二曰輿地曰建置曰河渠曰職

官曰賦役曰學校曰祠祀曰選舉曰恩綸曰人物
曰藝文曰雜志標目九十有一凡所記載各以類
附綱舉目張瞭如指掌矣

一志宜分先後輿地明而縣知所守矣有輿地則有
建置有建置則有職官有職官則有賦役有學校
有祠祀有選舉以養以教而人物生人物生而藝
文備矣然而其事非文不傳其人非文不彰也故
先之輿地而極之以藝文其有諸志之外無所附
麗而事可資掌故者則爲雜志以括之祥異亦雜

志之餘也雜志成而志全矣

一舊志之宜增補也漢人吳仲山碑趙明誠金石錄
錄之洪适隸識識之至于尹宙碑石依然尤爲可
據昔歐陽文忠公謂金石文字可以補史傳之缺
今悉增入而附金石門于藝文之後者此也

一舊志之宜刪削也曰陳實曰范甯按後漢書本傳
載實爲潁川許人蓋郡國志東漢潁川治許及鄆
陵等十七縣故以許人稱之亦猶孫寶張興之以
潁川鄆陵人是也范甯汪之子晷之曾孫世居南

陽之順陽晷見晉書良吏傳寧罷官後居丹陽而謂之鄆陵人可乎故傳與文悉刪之存德星臺者以流風餘韻可以廉頑立懦或在鄰邦杖履之所必及古蹟猶存謂之流寓當亦不謬不然陳之子孫范之祖父胡不連類而及而乃僅列二公何耶一舊志之宜改正也薛文清以隨任寄籍河南首領鄉薦卽改歸河津史傳甚詳然誦讀于斯發蹟于斯不謂之流寓可乎以之入鄉賢不可也

一河渠尤關民利茲于諸渠道皆極詳明纖悉備書故另立一類雖屬輿地亦關建置次建置後至恩綸乃選舉所由推不併入者便于檢覽也

一名宦者宦于鄆而有功于國有惠于民而名之也死封疆者節尤重焉故並錄之

一戶口附從賦役惟志今時現在若舊志所書間採一二以存其故

一文廟典禮儀注陳設樂章作志者每以天下郡縣皆同往往忽而不錄然禮樂不可斯須去而我朝尊崇之盛尤非前代所及今悉增入以便考訂

一壇廟惟祀典之正則書他若鄉俗所建多不可紀
概不書其寺觀惟名蹟古刹則書餘概不書

一舊志選舉門序次錯雜且多遺漏今悉更正惟庾
氏增至五十人猶武功志之于蘇氏亦是盛事

一舊志人物名目太繁且多扭合今悉照史例分類
列傳儒林則法遷史文苑列女則法范史孝友忠
義隱逸藝術則法晉書義行則法鄭樵通志他如武
功義行亦猶史之獨行類也餘悉刪之

一人物而載入正史必其人有足傳者乃作志家必
自操金管不肯以史爲據卽有之亦寥寥數語而
其人之首尾不見是志遇各史有傳者皆錄全文
或本傳太長間爲刪節則書明其下庶便參考有
專傳有合傳附傳亦依史法爲之

一生人不立傳者恐涉諛也蓋官評去後而定鄉評
歿後而定其秩官及士大夫有德行者姑俟諸異
日惟貞節不然然要必以合請旌之例爲斷爾
一藝文皆先賦而後諸體從昭明文選例也然尚書
始虞典漢書始諸志皆先述其事而後以他文論

斷之所謂先事而後文也志中諸體悉準諸此
一藝文例起前漢書備載書名卷帙及著作姓氏歷
代史書及三通率循此體鄆雖小邑著作家頗亦
不乏倣而爲之其深有望于志名山之業者
一舊志遺漏者補之疎誤者正之凡有辨說卽註其
下至存所當存逸所當逸雖盡易前文而一出一
入必慎若人物列女重關風教尤不敢不謹也
一志爲取徵之書貴傳信不貴傳疑非若小說家之
可以卮言寓言入焉故舊事必本諸書而所抄之

書皆分注之或加刪削則曰節或加隱括則曰見
至後來人物無書之可據者則書採訪諸君之名
不特見言之有本且以明取舍之咸出公論也
一引書之例第一條注某書連引二三條則曰同上
多至四五條則曰以上俱某書

一志中前輩悉直書其名竊取臨文不諱之義
一志雖法史而微異其言可法其事可傳錄之示勸
而鑿戒不錄者亦春秋善善長惡惡短之遺意焉
一舊志創于明正德己巳孫令讚越二十九年嘉靖

丁酉邑人劉尚書訥繼修越一百十四年我朝順治庚寅孫令丕承重修越十年己亥經令起鵬又修至今已百十四年矣其間會數經修輯俱不及觀成而止迄今未有定本誠下車之始卽與紳士商及志事咸欣然以重修爲請遂開局于壬辰之仲春閱十月而告竣增者十之五更者十之三刪者十之二事雖仍舊而體則從新祛浮覈實訂譌補缺頗費經營續修者當亦鑒余之苦心也夫

會稽施誠我真識

鄞陵縣志目錄

卷首

聖製

卷一

輿地志

區域
古蹟
村莊
風俗

道里
封建
園林
土產

沿革
岡阜

星野
鄉保

卷二

建置志

公署
兵制

城池
坊表

倉廩
附養濟院

舖司

卷三

河渠志

河道
湖潭

陂溝
橋梁

隄防

卷四

職官志上

官制

題名

卷五

職官志下

宦蹟

卷六

賦役志

戶口
存支

田賦
匠價

積貯
雜稅

起解
附辦料

卷七

學校志

學制
學田

祭典
附書院

卷八

祠祀志

壇壝
塚墓

祠廟
附漏澤園

寺觀

卷九

選舉志

薦辟
例貢

進士
例授

舉人
封贈

貢生
廕襲

武職
義官

掾階

卷十

恩綸志

誥勅

卷十一

人物志一

列傳

卷十二

人物志二 孝友 儒林

忠義 文苑

卷十三

人物志三 武功 耆壽

隱逸 藝術

義行 流寓

卷十四

人物志四 皇后 節烈

貞孝

卷十五

藝文志一 制 表

奏疏

卷十六

藝文志二 記

卷十七

藝文志三 序 牋書

論 募疏

贊 跋

箴 銘

卷十八

藝文志四 行狀 傳

墓誌銘 誄

墓表 祭文

卷十九

藝文志五 詩 賦

詞

卷二十

藝文志六 金石 經籍

卷二十一

雜志

叢記

祥異

鄢陵縣志卷之首

聖製

世祖章皇帝訓飭士子卧碑文

順治九年

朝廷建立學校選取生員免其丁糧厚以廩膳設學院
學道學官以教之各衙門官以禮相待全要養成
賢才以供

朝廷之用諸生皆當上報

國恩下立人品所有教條開列于後

一生員之家父母賢智者子當受教父母愚魯或有

非爲者子旣讀書明理當再三懇告使父母不陷于危亡

一生員立志當學爲忠臣清官書史所載忠清事蹟務須互相講究凡利國愛民之事更宜留心

一生員居心忠厚正直讀書方有實用出仕必作良吏若心術邪刻讀書必無成就爲官必取禍患行害人之事者往往自殺其身常宜思省

一生員不可干求官長交結勢要希圖進身若果心善德全上天知之必加以福

一生員當愛身忍性凡有司官衙門不可輕入卽有切己之事止許家人代告不許干預他人詞訟他人亦不許牽連生員作証

一爲學當尊敬先生若講說皆須誠心聽受如有未明從容再問毋妄行辯難爲師長者亦當盡心教訓勿致怠惰

一軍民一切利病不許生員上書陳言如有一言建白以違制論黜革治罪

一生員不許糾黨多人立盟結社把持官府武斷鄉

曲所作文字不許妄行刊刻違者聽提調官治罪

聖祖仁皇帝聖諭十六條

康熙三十年

敦孝弟以重人倫

篤宗族以昭雍睦

和鄉黨以息爭訟

重農桑以足衣食

尚節儉以惜財用

隆學校以端士習

黜異端以崇正學

講法律以儆愚頑

明禮讓以厚風俗

務本業以定民志

訓子弟以禁非為

息誣告以全善良

誠匿逃以免株連

完錢糧以省催科

聯保甲以弭盜賊

解讐忿以重身命

聖祖仁皇帝御製碑

至聖先師孔子贊并序

蓋自三才建而天地不居其功一申傳而聖人代宣其
蘊有行道之聖得位以綏猷有明道之聖立言以垂憲
此正學所以常明人心所以不泯也粵稽往緒仰遡前
徽堯舜禹湯文武達而在上兼君師之寄行道之聖人
也孔子不得位窮而在下秉刪述之權明道之聖人也
行道者薰業炳於一朝明道者教思周於百世堯舜文

武之後不有孔子則學術紛淆仁義湮塞斯道之失傳也久矣後之人而欲探二帝三王之心法以爲治國平天下之準其奚所取衷焉然則孔子之爲萬古一人也審矣朕巡省東國謁祀闕里景企滋深敬摛筆而爲之贊曰

清濁有氣剛柔有質聖人參之人極以立行著習察舍道莫由惟皇建極惟后綏猷作君作師垂統萬古曰惟堯舜禹湯文武五百餘歲至聖挺生聲金振玉集厥大成序書刪詩定禮正樂旣窮象繫亦嚴筆削上紹往緒

下示來型道不終晦秩然大經百家紛紜殊途異趣日月無踰羹墻可晤孔子之道惟中與庸此心此理千聖所同孔子之德仁義中正秉彝之好根本天性庶幾夙夜勗哉令圖遡源洙泗景躅唐虞載歷庭除式觀禮器摛毫仰贊心焉遐企百世而上以聖爲歸百世而下以聖爲師非師夫子惟師於道統天御世惟道爲寶泰山巖巖東海泱泱墻高萬仞夫子之堂孰窺其藩孰窺其徑道不遠人克念作聖

顏子贊

聖道早聞天資獨粹約禮博文不遷不貳一善服膺萬
德來萃能化而齊其樂一致禮樂四代治法兼備用行
舍藏王佐之器

曾子贊

洙泗之傳魯以得之一貫曰唯聖學在茲明德新民止
善爲期格致誠正均平以推至德要道百行所基纂承
統緒修明訓辭

子思子贊

於穆天命道之大原靜養動察庸德庸言以育萬物以

贊乾坤九經三重大法是存篤恭慎獨成德之門卷之
藏密擴之無垠

孟子贊

哲人旣萎楊墨昌熾子輿闢之曰仁曰義性善獨闡知
言養氣道稱堯舜學屏功利煌煌七篇並垂六藝孔學
攸傳禹功作配

世宗憲皇帝上諭訓飭士子碑 雍正四年

國家建立學校原以興行教化作育人材典至渥也朕
臨御以來隆重師儒加意庠序近復慎簡學使釐剔弊

端務期風教修明賢才蔚起庶幾樸棧作人之意乃比
年士習未端儒效罕著雖因內外臣工奉行未能盡善
亦由爾諸生積錮已久猝難改易之故也茲特親製訓
言再加警飭爾諸生其敬聽之從來學者先立品行次
及文學學術事功源委有敘爾諸生幼聞庭訓長列宮
牆朝夕誦讀寧無講究必也躬修實踐砥礪廉隅敦孝
順以事親秉忠貞以立志窮經考業勿雜荒誕之談取
友親師悉化驕盈之氣文章歸於醇雅毋事浮華軌度
式於規繩最防蕩軼子衿佻達自昔所譏苟行止有虧

雖讀書何益若夫宅心不淑行已多愆或蜚語流言脅
制官長或隱糧包訟出入公門或唆撥姦猾欺孤凌弱
或招呼朋類結社邀盟乃如之人名教不容鄉黨不齒
縱幸脫褫扑濫竊章縫返之於衷寧無愧乎况鄉會科
名乃掄才大典關係尤鉅士子果有實學何患困不逢
年顧乃標榜虛名暗通聲氣夤緣詭遇罔顧身家又或
改竄鄉貫希圖進取囂凌騰沸網利營私種種弊端深
可痛恨且夫士子出身之始尤貴以正若茲厥初拜獻
便已作姦犯科則異時敗檢踰閑何所不至又安望其

秉公持正爲國家宣猷樹績膺後先疏附之選哉朕用
嘉惠爾等故不禁反復惓惓茲訓言頒到爾等務共體
朕心恪遵名訓一切痛加改省爭自濯磨積行勤學以
圖上進國家三年登造束帛弓旌不特爾身有榮卽爾
祖父亦增光寵矣逢時得志寧俟他求哉若仍視爲具
文玩愒勿儆毀方躍冶暴棄自甘則是爾等冥頑無知
終不能率教也旣負栽培復干咎戾王章具在朕亦不
能爲爾等寬矣自茲以往內而國學外而直省鄉校凡
學臣師長皆有司鐸之責者並宜傳集諸生多方董勸
以副朕懷否則職業勿修咎亦難追勿謂朕言之不預
也爾多士尚敬聽之哉

鄆陵縣志卷之一

輿地志

區域
岡阜

道里
鄉保

沿革
村莊

星野
園林

古蹟
風俗

封建
土產

輿地莫詳於李吉甫之元和郡國志外惟杜佑通典爲最覈通典曰凡言地理者多矣在辨區域徵因草知要害察風土蓋區域不辨無以定道里因草不徵無以知分合繇區域以覈因草復繇因草以覈區域二者明而後星野古蹟得所考矣要害在山川關隘而鄆則無是僅岡阜而已封建固因草之一端而鄉保村莊園林則區域所遞及也故

並列之觀風俗問物產而輿地之概見矣不言河
防城池者另立一類也志輿地

區域

鄢陵見于春秋隱公時曰鄢鄭伯克段于鄢是也成
公時曰鄢陵晉侯及楚子鄭伯戰于鄢陵是也又戰
國策曰安陵秦王使人謂安陵君是也前漢地志潁
川郡有僞陵縣後漢郡國志作隰陵又曰隱陵酈道
元水經注洧水又東逕隱陵故城南是也又曰左亭
新莽改見前漢書註

路史國名記鄢地有三楚之鄢都今襄之宜城與莒
鄢鄭隰異羅苹註曰穆叔如莒及鄢陵登鄢陵城今
沂之安陵也鄭克段于隰則開封之隰陵漢之故縣
晉鄭戰鄢陵則鄭地故城在今鄢陵西北十八里
說文鄢與隰通前漢書地理志潁川郡僞陵顏師古
曰僞音偃羅苹路史註地有僞隰鄢姓亦有僞隰鄢
地名人姓宜有定音陸氏兼平上去三聲非是按史
記韓世家十四年秦伐敗我鄢徐廣曰鄢音於乾反
而今鄢陵人皆平聲呼之與姓同今定鄭隰楚鄢上

聲餘為平

道里

縣在省城南一百六十里廣三十五里袤一百一十里週圍二百八十五里共分九十六地方編戶一十八保由縣治北陸路一千八百里達於

京師

東至十方院十里界扶溝至縣三十五里西至二郎廟二十五里界許州至州七十里南至麻紉橋八十里界西華逕西華境至上蔡縣二百二十里

北至郟村舖三十里界尉氏至縣七十里

東北逕尉扶二縣郊至通許九十里

東南至西華九十里

西南至臨潁九十里

西北至洧川七十里

里感屬一百八十五里共合六十六里
縣界潁南一百六十里潁三十里里表一百一十

沿革

唐虞夏商 屬豫州

周 春秋鄭邑曰隰鄭伯克段于隰卽此後漢書郡

國志注鄭共叔所保故曰克又成公十六年晉


敗楚于隰陵呂錡射中共王目亦卽此處

戰國 屬魏水經注李奇曰六國爲安陵也昔秦求

地于安陵君唐且受使于此

秦 滅韓魏爲潁川三川郡鄆陵屬潁川

漢 始置鄆陵縣屬陳留郡又置隰縣屬潁川郡王



莽更名左亭光武時并隰入隰陵屬潁川郡

三國 魏改潁川爲許昌郡以其地封子彰

晉 仍爲縣屬潁川郡

南北朝 東魏屬鄭州部許昌郡北齊省入許昌縣

隋 開皇初郡廢七年復置鄆陵縣屬潁川郡十六

年置洧州治此又置蔡陂縣大業初州廢縣亦

省入

唐 屬河南道許州潁川郡武德四年改屬洧州貞

觀元年州廢復屬許州潁川郡

五代 梁屬東都開封府唐屬許州忠武軍晉漢周

並屬東京開封府

宋 隸京畿開封府

金 屬南京路開封府

元 屬河南汴梁路總管府

明 屬河南布政司開封府

國朝 因之

周禮保章氏以星土辨九州鄢于鄭屬豫州史記天
 官書以氐房心為豫州分星星歷紀潁川入房一度
 星曰大火宮曰天蠍時曰卯水經云鄭處辰火之野
 闕伯之地或云角亢在辰自軫十度至氐一度鄭地
 應之然此特據成論耳必求其實則天之高星辰之
 遠非精象緯之學者詎能測邪併存以俟考

星野

周禮保章氏以星土辨九州鄢于鄭屬豫州史記天
 官書以氐房心為豫州分星星歷紀潁川入房一度
 星曰大火宮曰天蠍時曰卯水經云鄭處辰火之野
 闕伯之地或云角亢在辰自軫十度至氐一度鄭地
 應之然此特據成論耳必求其實則天之高星辰之
 遠非精象緯之學者詎能測邪併存以俟考

故城在縣西北甘羅北保周迴九里一百六十步離
 今城十五里鄭伯克段晉楚之戰呂錡中王目皆在
 其地
 陶城在羅寨南保周同三里世傳陶侃所築水經云湏
 水西南流逕陶城者是也
 按陶公于惠帝太安二年擊張昌至成帝咸和九年
 薨凡四十一年其生平功業多在南方雖察孝
 廉時曾在洛陽劉弘退于梁侃亦在焉然非久居
 斷無築城之事及閱漢紀乃知陶含非侃也漢高
 帝時陶含以右司馬從擊燕定代功封開封侯食
 邑二千戶築此城卒諡愍傳至睢坐酎金免省府
 輿地志
 古蹟

古蹟

古鄢城在縣西北甘羅北保周迴九里一百六十步離
 今城十五里鄭伯克段晉楚之戰呂錡中王目皆在
 其地

陶城在羅寨南保周同三里世傳陶侃所築水經云湏
 水西南流逕陶城者是也

按陶公于惠帝太安二年擊張昌至成帝咸和九年
 薨凡四十一年其生平功業多在南方雖察孝
 廉時曾在洛陽劉弘退于梁侃亦在焉然非久居
 斷無築城之事及閱漢紀乃知陶含非侃也漢高
 帝時陶含以右司馬從擊燕定代功封開封侯食
 邑二千戶築此城卒諡愍傳至睢坐酎金免省府
 輿地志
 古蹟

載亦同

朱渢城府志云在鄢陵城南張橋村東今毀考史記渢以卒起豐入漢擊項羽及燕王臧荼功封鄢陵侯邑二千七百戶因築此城卒諡莊傳慶無後

馬領城向城張揚城

三城皆未詳見魏書地形志舊志無

太邱城天下名勝志載在縣城東一百步有太邱長陳實祠前有漆井省志亦同今無考

德星臺在陽和門內以陳實嘗會荀淑子弟咸在太史奏德星見其占曰五百里內有賢人聚後人因築臺

臺廢其裔叅議溥重築于西麓給事中鳳岡杜氏有

記

按世說及寰宇記皆載陳太邱過潁川荀朗陵家太史奏德星見則潁川之有德星亭宜矣鄢之有臺蓋亦聞風而興起者歟

漆井在縣西七里文範祠前世傳太邱故宅井口內漆以隔讎歲旱禱雨于祠輒應

燕王臺府志載魏文帝封燕王宇為鄢陵王築臺于城中故名

議臺在西營南保世傳曹操所築嘗集官僚議事于此

今無考

龍女池在縣南馬欄鎮龍女廟前池外周八丈深一丈四尺內周四丈水深三丈餘歲旱官民取水禱雨每應

太子坡在羅寨北保

鳳凰坡在張橋南元有臺世傳黃霸治潁川八年政成鳳凰數集此亦集處因名

臺子坡在彭祖店北

封建

漢

史記漢書功臣表 陶含以右司馬漢王五年初從

以中尉擊燕定代功封開封侯食邑二千戶築城

于鄆名陶城卒諡閔傳音偃睢元鼎五年睢坐酎

金國除

史記漢書功臣表 朱濞以卒從起豐入漢以都尉

擊項籍臧荼功封鄆陵侯食邑二千七百戶卒諡

莊傳慶無後國除

魏

三國志曹彰傳 建安二十一年封曹彰為鄆陵侯

註文帝嗣位以鄆陵塔薄使治中牟

明

明史諸王表 正統六年封安僖王子于鄆陵 按明

太祖第五子封于開封為周定王定王子封于胙

城為莊簡王莊簡王子又分子于鄆陵為安僖王王

薨子靖簡王嗣靖簡王薨子端僖王嗣端僖王薨

恭昭王嗣又四傳明亡國除王府與縣署同城

岡阜

彭岡 在縣北二十里彭祖店 楊村岡 在縣北十里舖西

孝子岡 在縣東南七里長 曲岡 在趙寨東南

河岡 在曲莊東南 野岡 在追岡西

三岡 在陶城西北長二 樂陵岡 在縣東九里許

左家岡 在鳳凰岡前世傳 半截岡 在彪岡東

戴家岡 在古城北 馮岡 在沙灘西北

簡岡 在馮岡北 太平岡 在簡岡西方

戚家岡 在阮寨東 阮寨岡 在郟村舖東

彪岡 在縣東北十里北枕泊水

龍形岡 鄆城半枕其上西自王岳村入本境東至葦菜園入扶界上有蔡河故道即舊志所載長堤

鳳凰岡 在縣北十五里因形如鳳故名南北長五里上有寨

楊河岡 在丁家橋南三岡並峙東南兩岡袤三里西岡袤五里上有鄭中丞墓

文家岡 在黨家岡東北迤邐通滕家岡毛家岡田家岡直抵古城西南隅約十五里

黨家岡 在縣西北袤二里與文家岡合為一

郃村岡 在縣北南北長二里半屬鄆半屬尉

黃土岡 在縣北靠城

鄉保

鳴鳳鄉 在羅寨南保

美化鄉 在西營北保

孝子鄉 在趙坊北保

頽川鄉 在南東保

右四鄉

趙坊北保 在城東十里舊趙坊中保併入

南東保 在城東二十里舊南東中保併入

趙坊南保 在城東南二十五里

張橋北保 在城東南四十里

北東保 在城東北三十里

張橋中保 在城南三十五里舊張橋新保併

羅寨南保 在城南五十五里

張橋南保 在城南五十五里

新開保 在城南六十里

西營北保 在城西十五里舊西營中保併

西南保 城西二十里舊南西 西營南保 城西南三十里

西北保 城西北十八里舊北 羅寨北保 在城西南

羅寨中保 在城西南三十五里 甘羅南保 城西南三十里

甘羅北保 在城北十五里 墾祥保 在城北

右十八保

按舊志二十六保今併作十八保其餘八保曰在城曰敦孝曰張橋新曰羅寨新曰西營中曰甘羅中曰南西中曰趙坊中詳註其下而仍書其名者備考也

村莊 附鎮店

東街 城在 于家寨 離縣五里

東張村 離縣八里 南里段 離縣二里

周家營 離縣五里 吳家村 離縣五里

牛家集 離縣六里 狐塚村 離縣二十二里

屈莊村 離縣十里 中廟村 離縣十四里

河岡村 離縣十五里 新莊村 離縣十六里

張橋北 離縣三十里 張橋南 離縣三十里

沙灘村 離縣十五里 安和村 離縣四十里

興地志 村莊

南塢村 離縣五里

北塢村 離縣四里

拐地角 離縣七里

橫里村 離縣七里

倉頭村 離縣八里

以上東路

南街 在城舊南關併入

馬欄鎮 離縣十里

南三道河 離縣二十五里

閻段村 離縣三十里

只樂村 離縣三十里

野岡村 離縣三十五里

順羊村 離縣四十里 舊順羊北改

聖壽寺 離縣四十五里 舊順羊南改

龍駒村 離縣四十三里

桑岡村 離縣四十五里

望田村 離縣五十里

河上村 離縣五十五里

追岡村 離縣六十三里 舊新色村併入

十室村 離縣六十里

扶濟村 離縣六十六里 舊三岡村併入

張亮橋 離縣七十里

明里村 離縣七十五里

東屯 離縣六十里

西屯 離縣六十里

屯溝村 離縣四十里

和劉村 離縣五十里

以上南路

西街 在城

西關

西北杜郎 離縣八里 舊東杜郎併入

西杜郎 離縣八里

漆井村 離縣十里

橋頭村 離縣十里舊圪當頭栢梁橋兩處併

甘羅村 離縣十里

議臺村 離縣十里

北三道河 離縣十里

義女店 離縣十里

伍子村 離縣十里

伏村 離縣十里

紙坊村 離縣十里

趙寨 離縣二十里舊王家店併入

明義村 離縣二十五里舊陳畫店併入

雲漢 離縣二十五里

葛村 離縣二十五里

許由寺 離縣三十里

常家寨 離縣三十里

羅寨村 離縣三十二里

以上西路

北街 在城

左家岡 離縣十里舊秦村謝家坊二處併入

馬坊村 離縣二里

張坊村 離縣二里

黃龍村 離縣五里

五里廟 離縣五里

二郎廟 離縣六里

彪岡 離縣六里

楊河村 離縣七里

岡里村 離縣八里

所村 離縣八里

西小岡 離縣八里

黃村店 離縣十里

王岳村 離縣十里

古城村 離縣二十里係古城南北二村併

彭祖店 離縣十里

孫家莊 離縣二十二里係彭祖店分立

莊頭村 離縣十二里

慕家寨

離縣二十五里

南馬村

離縣二十八里

官莊

離縣十八里

郟郵舖

離縣三十里

北七汲

離縣十五里

以上北路

按舊志村莊共九十七處今止八十五處併改隨時註明其下以僭稽考

園林

葆光亭

宋尚書崔立建引城北蔡河水爲之見韓魏

公安陽集今廢

西亭

亦崔立建見安陽集今廢

三花園

在東郊明尚書劉訥築層岡聳峙渙水遙連

臺榭矗起川原入望環列古柿數千株葉燦霜辰紅

霞歷亂庭中有紫薇皆百餘年物林麓秀隱不數山

居子巡自南康致政歸彈琴歌咏娛老于此

長春園

在邑治東北明憲副梁策築踞龍形岡三岐

之一故基獨高有亭臺有橋梁左積石為山山亘以
洞泉甘土美巒壑幽闕移情累日幾忘塵囂

學如圃 在邑治東南明都憲鄭二陽築地僻林深溪

流經戶圃植其左草堂四扇梅花繞砌峰栽石丈庭

納松陰旁多菜圃桔槔之聲自怡朝夕

日涉園 明奉常梁克從築今廢

風俗

漢書曰潁川本夏禹之國夏人上忠其弊鄙樸又曰潁
川韓都士有申子韓非刻害餘烈高仕宦好文法民以
貪遴爭訟生分為失韓延壽為太守先之以敬讓黃霸
繼之教化大行迨入國朝治隆俗熾河南通志云羣處
有義婚喪有助士專詩書民重稼穡是已近年乃有不
然者蓋成化以前民風尚淳鮮知興訟俗崇儉約筵會
無珍異之設今則好訟為開封諸屬最婚筵喪奠爭尚
侈靡廣招親朋以哀儀物甚至限錢幣之數以計豐齋

飭厨召樂以賞費相高有喪之家僧道兼用倡優雜進
雖朝廷欽禁奢侈士大夫奉行矯正而猶不能盡變其
大者輕骨肉而重結拜喜析爨而厭同居信師巫而尚
淫祀賈區比鱗田多荒穢子弟出入裘馬紛華已頽隆
漢之風漸淪申韓之習善乎班固之言曰繫水土之風
氣故謂之風隨君上之情欲故謂之俗茲欲移易尚賴
樞機敢附名言期返忠樸

舊志

劉訥真率會誠畧曰斯會斯名實維司馬文正公是
師公之行無不可對人語者誠而已矣後世不知誠

爲何物今安能保斯會之實之不爽乎夫聯族姓之
異以爲好而動必式古信美矣然或不惟其心惟其
迹彌文踰質飾譽于外正今日不誠之一誠也能免
於是否歟傳曰久要不忘平生之言如進諭諭以相
與退未幾而訛訛者至焉甚至利在則疎者親寵失
則親者疎翻覆如賈豎子之交于市者可不誠哉繫
居嘗號讀書士幽獨無戒懼功對衆不免于矜持或
燕過三爵輒昏然失度長謔滋僻難矣哉其或善不
虛受過則吝改自棄于道自遂其非者此誠尤聖賢

之所喫緊不善可惡也抑或有特立負俗見擯于鄉
評斯其人不可不察否則詭隨者其有合乎周恤善
行也然君子視義可否焉苟舍窮乏而私所識傷惠
泥仁未盡善也佛老教熾士大夫且妄宗之于里巷
乎何誅故有糜財以崇其宮食其徒凡子孫喪厥祖
考舍禮教而信輪迴以徼必無之福是則矯誣之尤
者諸子無乃是惑與動不以正惟士之恥使吾宰成
武城之政諸子當厲澹臺之節其或請謁公門假道
諂諛失己且撓法其爲人汙介何如也之八者一或

弗誠非誠矣司馬公以誠爲終身行之格訓明徵豈
欺吾者諸子之嘉遯方助余導俗其未仕之彥又將
與有政教之責而咸讓余一日長者于斯會也必曰
司馬公之訓具在其勿嫌余戒而以老諄忽諸

梁廷拭曰按舊志風俗追美成化以前憤惋成化以
後竊有疑焉夫成化時已習于囂薄奢侈矣然吾觀
萬歷末年人文俗尚端慤質樸所謂士相與言仁義
于閭晏農相與謀稼穡于田野庶幾見之豈風氣之
在天下也時漓時淳如波流淪漣或清而或濁與及

讀蘇明允族譜亭記乃知風移俗易自漓而淳自淳而漓一方之望人者其倡導爲甚捷也蓋至天啟以後而邑之風氣大變矣卽明允之論一覆按之骨肉之恩薄其由所謂逐兄之遺孤而不卹與孝悌之行缺其由所謂多取先人賞田而欺其諸孤子與禮讓之節廢其由所謂爲其諸孤所讟訟與嫡庶之別混其由所謂以妾加其妻與閨門之訓衰其由所謂篤于聲色謹譁不嚴與廉恥之路塞其由所謂黷財無厭惟富爲賢與嗚呼其輿馬赫奕足以蕩惑里巷其

官爵貨力足以搖動府縣其矯詐修飾足以欺罔流輩衆庶榮其名迹覬而慕之士設反道之行以追時好而取世資禮義不足以拘君子刑戮不足以威小人兼業專利者爲雄傑飾變詐爲奸軌者自足乎一世之間而風俗敗壞極矣以聞若彼以見若此古今人不甚相遠殆謂是與至于婚筵喪奠邑俗居奢儉之中惟是殘燬之後仍欲踵熙洽之盛此不可以爲訓用載名言取國奢示儉之義是亦倡導者之一機也

土產

紅花成化以前種者多一統志云鄢陵尤盛邑人程鶴
 倅贛州時張東海汝弼守南安贈之詩曰鄢陵紅花
 紅且香摘來堪染舜衣裳上方有路無人獻却向章
 江洗夕陽
 五穀惟粟類最夥其色有青白紅黃其名有六月先七
 里香八百光金壩齒者皆嘉他如雞腸兔蹄龍爪猴
 尾隨象立名動以百計焉
 稻不秧種紅澁欠佳

黍亦有白紅黎三色其最早者曰奪麥場

麥秋種亦有春種者大麥三月黃嘉小麥白黃皮蝟子

之外有白麥御麥為最嘉其他曰紅桿曰鐵桿曰光

頭曰條兒之類類難悉舉

豆有青白黃紅黑茶褐等色天鵝彈老鴉眼花斑雞虱

羊眼等名然大青豆及羊眼黑豆堪作豉豇豆曰羅

裙帶白不老者堪為菜紅小豆堪入藥餘皆尋常

芝蔴有白黑黃三色葉葉三異名

菜之類不盡載惟蘿蔔產馬坊者嘉萵笋近年亦有之

頗敵京口者矣

瓜之屬與他處同

菓之類凡接生者俱佳不能盡載異者曰文冠菓其最

佳者杏曰海東紅李曰硃砂斑玉黃近年有瓶梨開

州梨而大甜梨則本處故嘉者也

竹木率同他處不載

花草名品甚多近年有仕秦者移牡丹十餘種其最佳

者曰武夷青平頭紫觀音面獅子頭玉樓春寶樓臺

出嘴白醉楊妃鶴頂紅真紫粉梢

雜花春有紫丁香金地棠紫匾竹藍玉簪凌霄醮醮夜
合殊佳秋則黃葵及各色奇菊終歲開者月季花四
季槐芍藥以下不盡載

藥類數十皆不著名

禽類數十有名後懊蟲者其形類杜宇聲稍異亦猶橋
枳隨風土而變者焉

獸產本處者亦同他處有原無而忽有者則異矣

鱗介昆蟲處處有之不可殫紀

帛類有綾紬花絹手帕兼絲

牡丹又有佳者曰太和紅奪翠花紅盛粧騰龍舞鳳錦

繡叢

芍藥不知盛自何時其最佳者曰丹山鳳雙金兩玉圍

臘脂點玉金玉交輝含嚙嬌盛奪翠軟枝白

臘梅不知有自何時有名老蘇梅勝府梅任家梅最後

出者名金蓮花絕佳三種在承平時鄢為獨勝兵亂

之際家園無主土人皆摧折為薪故今日遂寥寥無

幾

櫻桃舊日止有紅者忽產白色一種色如水晶味若蔗

漿自經兵亂其種遂絕

以上舊志

鄢陵縣志卷之一終

鄢陵縣志卷之二

建置志

公署
兵制

城池
坊表

倉庾
附養濟院
舖司

立邑必先疆域次建置建置備而邑定矣公署以臨蒞之城池以襟衛之有倉庾則知積貯有舖司則知傳命有兵制則知防守有坊表則知激勸而又加之以養濟而體仁而廣仁固經國之要務亦保釐之至意也志建置

公署

明以前
失考

明

洪武二年縣丞董子輝始建縣治正廳儀門六房架閣儀從庫廳後知縣衙縣丞主簿翼於東西典史東南吏舍西南

天順二年知縣焦珪修葺

成化十一年知縣陳理重建穿堂

弘治八年知縣王時中增建後堂扁曰繼牧撤新前堂三間六房二十二間前爲戒石亭亭前爲儀門門外左蕭何祠門內右監房中建獄神廟題名有碑嵌前堂北壁退思有銘嵌繼牧堂東以前門爲

鐘樓扁鳴遠二門爲譙樓置更鼓焉

正德元年知縣孫讚又通修完美衙後建怡寧樓左開燕亭右思政亭正德七年悉燬于兵止存繼牧堂及六房之在東者十二年龍章等漸次修葺嘉靖八年知縣馮霄改衙偏右以爲得風水云

二十二年知縣張祥改建樓于二堂後名曰觀民樓

國朝

順治四年知縣呂九圍修堂樓一所東房一所中房

一所小房二所二堂一所東西書吏房二所

梁之鯤曰鄆陵公署明末兵燬蒞任者借居民房

邑侯呂九圍督工草創始遷居縣衙以聽政焉

順治五年知縣孫丕丞修鐘樓一所又重建申明亭

旌善亭

順治十四年知縣經起鵬重修庫樓一所又修縣署

大門一所

順治十五年知縣經起鵬重修寅賓館一所鄆陵賓

館自丙午重建之後五十餘年歲久傾圮是年復

修完固如初

康熙四十七年知縣李而侗重修鐘樓朱櫺墨柱廣

廈四圍式似魁樓匾其額曰響徹雲衢

雍正二年知縣孫國璽重修怡寧樓

雍正四年知縣童守祿重建申明亭旌善亭于鐘樓

兩側東申明亭西旌善亭蓋二亭舊在譙樓前年

久頽廢也又建木坊于鐘樓前西街口題曰宣化

撫民清修律已今毀

雍正十三年知縣嵇琰重修申明亭

乾隆六年署知縣韓儀重修大堂並書吏房一十六楹東西皂隸房各二間

乾隆九年知縣姜綰重修鐘樓譙樓儀門並水亭十年三月重修申明亭創建門樓額以石匾內供忌辰牌于中楹懸

聖諭廣訓十六條于兩側十七年知縣張繩祖重修三十六年知縣施誠捐俸重修又重建書吏房二十四間

庫樓一座 在大堂東順治十年知縣經起鵬修雍正六年知縣童守祿重修乾隆八年知縣姜綰建墻垣門樓又建櫃房二間

典史署 在縣署東係縣丞舊衙縣丞與主簿皆被裁典史移居焉乾隆二十四年典史姜信重修主簿衙吏舍與典史舊衙皆毀

陰陽學 在縣治東廢

醫學 在縣治東廢

僧會司 在天寧寺內廢

道會司 在太清觀觀久廢重建于關王廟後仍置

司署廢

教場二 一在南關東王時中設內建演武亭一所

廢一在五里溝北正德八年因添民兵暫設俱廢

今教場在城南半里許

舊學道署 在縣治東街梁氏故宅明末河齧開封

區廨没入地中迺徙鄢陵學道張天植有臨雲堂

記今廢

舊布政分司 在縣治正東知縣譚敬宗建西口立

旬宣坊明季坊燬順治二年知縣呂九圍修後堂

書吏房厨房東西皂隸房二門大門東西支房今廢

舊按察分司 在縣治東南洪武十一年主簿楊信

可建司前立肅清坊燬止存前堂今廢

舊府館 在縣治西知縣陳理建孫讚重修今廢

在城驛 在縣東元置洪武初裁

雙泊河巡檢司 在西北保洪武八年設後裁

弘仁院 萬歷四十年知縣張舜典建計地四畝鄉

約亭六楹題曰弘仁堂後樓三楹曰遵王樓左右

廡各四楹中門曰絃歌虛門之東西各築義學四楹中復闢一門曰厚正門之南東西草房各四楹正南草房四楹更南東西屋各四楹以爲子弟設科者居樓後義倉東西各六楹北之東西各四楹會計亭二楹俱毀順治四年知縣呂九闢重修大門二門書吏房前堂廚房後樓今毀雍正六年改建節孝祠其一隅也

城池

鄆陵自漢置縣始設城古城距今縣北十八里水經注所云洧水又東逕隱陵縣故城南是也今城不知何時爲水患所遷舊志失考故不得其詳縣西預備倉迤南有廢城基然亦終無實據也

明

景泰元年知縣康健增築高一丈二尺濶如之濠廣二丈深一丈五尺周計五里一百五十步東門曰陽和西門曰榮樂南門曰長寧北門曰永安

成化十一年知縣陳理重繕週計六里九十步蓋陳令時始西展也

正德壬申盜起河北鄆城不守戊寅知縣龍章因舊一修徵記于崆峒李氏稱述頗侈無何城圯

嘉靖甲申知縣尹尚賢始大築之東毀三官廟西猶撤乾明寺山門基濶四丈高二丈二尺濠廣三丈八尺深二丈有奇四門皆設重門舊堞惟土悉易以磚十閱月而功告成望之屹然崇墉保障之功于是爲大已甃四北一隅將次第通甃作樓櫓懸

橋間而調知蘭谿矣

嘉靖乙未知縣史文彬撤縣北毀寺磚先修門橋將擬燒磚通甃會以憂去

萬歷壬子知縣張舜典補築城東西南三面一千八十四丈補甃北面磚城七十二丈城頭甃墻五百七十二丈四門暨小北門各創重樓四門外甃城皆易以甃濬濠藝蓮護堤皆樹以檉又創角樓五敵樓六箭樓四城上增修女墻一週可六里許大鏡十有五鏡樓八長鎗及刀三百件火藥二百觔

又取易乾之四德榜署四門曰體仁曰嘉會曰和
義曰貞幹復以山川形勢之槩榜于其外東曰襟
帶青徐南曰江漢通途西曰攬勝嵩華北曰溱洧
環竒又取四時之氣曰青陽曰朱明曰白藏曰玄
英一時城修器繕金湯百雉煥然改觀

崇正六年向之築者壞補者傾樓櫓崩圯雉堞頽敝
守禦之具一無可恃流氛壓境時事孔亟邑人大
司馬梁延棟目擊時艱情切桑梓毅然以身任之
約閩縣紳衿同知縣任中鳳斟酌詳確輸磚供用
刻期告成凡三閱月而樓櫓敵臺及城四圍皆甃
崇墉危堞巋然山立後經流寇折毀典史李經復
修較昔低一尺餘敵臺門樓一無存矣

國朝

順治八年署縣事布政使司經歷司經歷汪某移西
城門樓于東門鄢陵舊傳形家言皆謂東面宜高
自四城門樓毀于寇而西門爲僞官所建巍然獨
峙且上列僞銜亦不可以示後汪令毅然撤去移
置東城人咸稱善復擬更建三樓會以交代去遂

不果

順治十五年知縣經起鵬重修

康熙十五年知縣裴憲度重修

康熙二十八年知縣許承澎增修

康熙四十四年知縣李而侗補築內城

雍正七年知縣童守祿補甃外城

乾隆二年知縣陳世明鑿池幫城址

乾隆四年雨瀑水漲東西兩門皆頽小北門左側傾

圯三十餘丈四百城垣坍塌殆盡知縣張嵩齡慮

奎樓損壞先行補修東南隅十餘丈

乾隆九年知縣姜綰重修北面衙署後五十餘丈又

修小北門左城基

乾隆二十九年知縣陳子檜通修子檜捐俸銀四百

兩公費銀八百三兩有奇紳士蘇帝輔等公捐銀

八千一百七十三兩有奇于三月興工至十月完

竣制仍其舊

正統五年知縣譚敬宗奉例勸粟始易縣
 西民地二十畝中及兩旁各建五楹弘治六年知
 縣王時中積穀漸盈又易生員李良地二畝造屋
 二十九楹弘治十三年知縣任恕又于西偏前後
 立倉通前五十餘楹嘉靖九年知縣馮霄措積近
 萬未幾例止照常收貯罰贖或但發領帑銀易買
 云萬歷壬申知縣陳登雲重修萬歷壬子知縣張
 舜典建預備倉坊一門內兩旁設義學各三楹後

倉庾

預備倉

正統五年知縣譚敬宗奉例勸粟始易縣
 西民地二十畝中及兩旁各建五楹弘治六年知
 縣王時中積穀漸盈又易生員李良地二畝造屋
 二十九楹弘治十三年知縣任恕又于西偏前後
 立倉通前五十餘楹嘉靖九年知縣馮霄措積近
 萬未幾例止照常收貯罰贖或但發領帑銀易買
 云萬歷壬申知縣陳登雲重修萬歷壬子知縣張
 舜典建預備倉坊一門內兩旁設義學各三楹後

燬止存坊及後廩三楹順治十四年知縣經起鵬
建常平倉及大門各三楹今改作大有倉

大有倉 在縣治西小北街卽係預備倉雍正二年
知縣孫國璽慮倉多難守因合貯常平義社等倉
穀石毀舊廩重建改名大有共房三十九間有碑
記六年知縣童守祿又建餘廩二間以備緩急之
需乾隆十七年知縣張繩祖修三十七年知縣施
誠重修

富有倉 在縣治東雍正三年知縣孫國璽改舊察
院寅賓館剏建以貯漕谷匾題富有共房十四間
乾隆九年知縣姜綰增建二十一間二十二年知
縣陳子檜修三十一年知縣陳子檜添建二十五
間三十七年知縣施誠重修

社倉 在小北街南頭路西雍正十三年知縣嵇琰
毀常平倉剏建共三間址係知縣高有聞生祠
廣育倉 在大堂西貯每歲體廣兩堂地畝所收租
稞雍正十三年知縣嵇琰建

舖司 附路柳

在城總舖

十里舖

彭祖店舖

卻村舖

陳畫店舖

總舖北至十里舖十里舖至彭祖店舖十里彭祖店舖至卻村舖十里卻村舖至尉氏縣南曹舖十里

總舖西至陳畫店舖二十里陳畫店舖至許州五女店舖十五里

總舖東至扶溝太尉舖二十里

總舖南無舖

附路柳

雍正二年知縣孫國璽奉文栽種路柳東至扶溝界西至許州界南至西華界北至尉氏界又縣南大路東至周家營西至雲漢村共一萬二千二百二十株四年知縣童守祿補栽如原數

兵制 附路防兵汛

鄆陵舊無專防屬洧川把總兼攝自雍正五年督撫田文鏡具題鄆陵額設外委把總一員歲支餉銀四十八兩支米銀七兩四錢額設守兵十八名除把總坐糧一名止十七名每名歲支餉銀十二兩支米銀三兩七錢弓箭手什物腰刀一撒袋一弓一大箭三十囊斗一叉口一套褲三勒鞋三號袍一號褂一盔一烏鎗手什物腰刀一烏鎗一皮包一號褂一棉盔棉甲一火藥五筋鉛彈二百個火繩三盤

路防兵汛

一在彭祖店雍正二年知縣童守祿奉文修墩臺一座
 營房三間三年又添營房三間馬棚一間墻垣俱備
 牌坊一旗杆一虎頭牌一黑紅棍二木架一烽烟墩
 三
 一在周家營房柵旗牌與彭祖店同無墩臺
 乾隆三十六年知縣施誠重修

坊表

明

敦孝坊

在縣東

望恩坊

在縣南

仁壽坊

在縣北

思賢坊

在縣西

中州望邑坊

在縣治前

雲衢坊

南門迤東通庠

大司徒坊

尚書張睿

秋官坊

封君劉海

解元坊

永樂庚子薛瑄

宮保坊

尚書坊

大中丞坊

大方伯坊

俱尚書劉璟

大理坊

繡衣坊 俱司丞 魏瑋

都憲坊

銀臺坊 俱都御 史魏訥

秋官坊 郎中 牛緩

地官坊 封君 陳銓

御史坊 陝西道 劉訥

方岳坊 參議 陳溥

內臺總憲坊 都御史 劉訥

世尚書第坊 尚書 劉訥

父子尚書坊 劉璟 劉訥

七世恩榮坊 知府 劉巡

薇省晉封坊 參議 陳溥

父子進士坊 陳溥 陳棐

大諫院坊 給事中 陳棐

禮曹大夫坊 參議 胡東魯

兩朝恩命坊 封君 梁金

恩榮坊 副使 梁策

綸音載錫坊 封君 梁慎

玉署清卿坊 太常寺少卿 梁克從

節義坊 在縣治南街為故民 范湖妻徐氏建

節義坊 在縣治東街為生員 剡古妻周氏建

國朝

貞節坊 在杜郎村為廩生 梁墀妻劉氏建

節孝坊 在漆井村為武生 鄭瑞妻王氏建

節孝坊 在杜郎村梁家莊 為梁壇妻劉氏建

貞節坊 在城內西街為張子旺妻姜氏建

貞節坊 在王岳村為于祚永妻步氏建

貞節坊 在城外東南隅為王錫妻靳氏建

節孝坊 在張橋為王二西妻姚氏建

節孝坊 在張橋店為曹光彬妻韓氏建

節孝坊 在張橋龍王廟為裴功臣妻李氏建

貞節坊 在城內東街為韓樹本妻谷氏建

貞節坊 在樂陵岡為張其梓妻章氏建

養濟院 舊在德星臺側知縣王時中徙于天寧寺前
 嘉靖十四年知縣史文彬重修萬歷四十年知縣張
 舜典因舊院窄小復于天寧寺衙路西開創一所
 雍正十二年知縣嵇琰重修乾隆八年知縣姜綰重
 修十八年知縣張繩祖重修二十五年知縣陳子檜
 重修三十七年知縣施誠重修
 體仁堂 先在大北關路西係知縣郭萬象生祠舊址
 雍正十二年知縣嵇琰改建乾隆四年水壞署知縣

附養濟院

養濟院

舊在德星臺側知縣王時中徙于天寧寺前
 嘉靖十四年知縣史文彬重修萬歷四十年知縣張
 舜典因舊院窄小復于天寧寺衙路西開創一所
 雍正十二年知縣嵇琰重修乾隆八年知縣姜綰重
 修十八年知縣張繩祖重修二十五年知縣陳子檜
 重修三十七年知縣施誠重修
 體仁堂 先在大北關路西係知縣郭萬象生祠舊址
 雍正十二年知縣嵇琰改建乾隆四年水壞署知縣

韓儀移建于三賢塚共房五十間二十八年知縣陳子檜修三十年知縣陳子檜重修三十四年陳子檜又修三十七年知縣施誠重修

廣仁堂 在城隍廟路東係倉廩舊址雍正十三年知縣嵇琰共建房二十間乾隆二十八年知縣陳子檜修三十四年知縣陳子檜重修三十七年知縣施誠重修

熨剛克曰體廣兩堂建于邑令嵇琰奉督撫王士俊文勸捐地畝四頃七十三畝九分六釐二毫六

絲五忽又查出韓乘時等欺隱地二頃五十二畝二分六釐三毫兩共地七頃二十六畝二分五釐五毫六絲五忽每歲收租存廣育倉膳養兩堂貧民定例每人月給穀四斗錢一百文冬月賞綿襖一件

附捐體廣兩堂地畝姓名

監生梁起漢捐地一頃零三畝四分七釐九毫共十段欽燦佃種交稞糧銀官備後同 監生韓遴捐地十畝共一段趙勤佃種 監生陳倫捐地十畝共一段劉正佃種 監生劉大成捐地十畝一分六釐七毫共二段董祥佃種 武舉陳瑞杭捐地十畝零三釐共二段許德佃種 貢生張際可

武舉際盛共捐地十五畝一分八釐四毫共二段
 耿同佃種 貢生張元福捐地十二畝零一釐共
 二段曹允慶佃種 貢生楊炎捐地十畝共一段
 張經佃種 貢生于之漸捐地十畝零五毫一絲
 五忽共一段李應正佃種 監生曹鶴齡捐地十
 畝七分九釐九毫共一段賀公賢佃種 監生曹
 文桂曹文斐共捐地十五畝零一釐共一段曹錫
 福佃種 監生常思謨捐地十畝共一段化京佃
 種 監生陳中選捐地十畝五分共一段鄭德興
 佃種 監生殷元美捐地十畝四分九釐一毫共
 一段張秉祿佃種 監生李素安捐地十畝零七
 毫共一段李素軍佃種 監生耿克恭捐地十畝
 零五釐八毫共一段張文重佃種 監生韓松齡
 捐地十畝共一段袁孟道佃種 監生田廣心捐
 地十一畝零七釐九毫五絲共二段王天樞佃種
 監生牛承德捐地十畝一分三釐二毫共二段
 歐陽太寇有文佃種 監生劉俱捐地十五畝三
 分共一段王化鳳佃種 監生韓遇旭捐地十畝

共一段王四佃種 生員梁銘旂捐地十畝零四
 釐二毫共一段張信佃種 生員康鑑捐地十畝
 二分二釐四毫共三段孫睿佃種 生員谷洵捐
 地十二畝六分八毫共三段梁士龍佃種 生員
 慶大典捐地十三畝共四段李國璽佃種 生員
 常禧捐地十一畝八分九釐一毫共二段趙儒佃
 種 生員張中錦捐地十畝共一段鄭緒佃種
 武生鄭炳捐地十畝共二段鄭仁佃種 生員陳
 梅捐地十九畝八分一釐六毫共一段蘇文士佃
 種 吏員趙榮捐地十畝零二釐六毫共一段趙
 榮承佃種 吏員王理民捐地十二畝零四毫共
 一段孫淑尼佃種 監生王延禕捐地十五畝共
 三段郎謙佃種 貢生王延禮
 捐地十五畝共三段黃琦佃種

[Faint bleed-through text from the reverse side of the page]

鄢陵縣志卷之三

河渠志

河道湖潭

陂溝橋梁

隄防

鄢邑土壤平曠無高山大川舊河多湮塞往往有旱乾之虞然地當陽城下游溱洧之水注之每夏秋之交客水泛濫千頃膏腴頓成澤國水之故道下接扶溝扶人又築堤以自固遂使厥水無所歸而鄢之爲害滋甚前明王公時中孫公讚馮公霄史公文彬或防或濬各有成效而高公有聞之澤爲最長然水勢怒下奔騰之勢急於萬馬功用罔

勿壞予承乏後未嘗不經營日夕以之昔歐陽公
修唐書凡一渠之開一堰之立必詳載地理志中
誠以事關畝畝有不可廢者爰採舊聞驗諸形勢
悉爲櫟括以備簡稽但河流遷徙靡定當以今合
古不當以古證今不若他類之以編年遞及也并
附隄陂橋梁者事從其類焉志河渠

河道

雙洎河卽洧水下流自溱洧二水並流逕新鄭縣城南
又東受黃水又東受南濮北濮二水又東南受龍淵

水又東南受稟水逕長葛縣城至東南郭折而北流
入洧川界復東受清泉水又東南逕洧川城南受大
沼水又東南逕新汲故城北東南入鄆陵界又東北
入扶溝界東注于沙河卽汴河

溱水一名澮水源出密縣東南平地一云出鷄絡塢東
南流經故鄆城西爲柳泉水又南注于洧並流而東
洧水源出密縣東南馬嶺山中超化寺東之金花泉縱
廣二畝泉源湧出山趾東北流受綏水又東受滴瀝
泉水又東南受承雲二水又東受馬關水又東至新

鄭縣與溱水並流東至長葛合流是爲雙洎河

劉訥曰溱水卽潛水水經注云郟水注于潛潛水注于洧詩所謂溱與洧者也洧水出潁川陽城山蓋馬嶺之總目東過新鄭南潛水注之東南與龍淵水合又東逕長葛及鄆陵故城南謂之雙洎今縣北二十里爲舊雙洎河成化以前逕彭祖店東入小黃河弘治九年山水泛漲決洧川栗家口河始淤塞水趨南與七里河漫爲一陂東西接扶洧二縣界洧田不下萬頃知縣王時中嘗謂築口

不如濬河正德四年知縣孫讚再築之患如故嘉靖二年知縣尹尚賢議行濬道法會先城事未及爲調去嘉靖九年知縣馮霄力主前議先塞決口以遏橫流次開支河以分水勢第因河窄堤薄未幾潰決汪家坡距縣僅三里于是城郭田廬塚墓咸可憂矣嘉靖十四年知縣史文彬亟往督築誓神程工是歲田始稼方議堅築汪家坡口而以憂去明年水大至隄盡決仍出古城南流患較前尤甚用是知縣曾添錦令民韓章奏行再修竊惟此

水來自西北勢如建瓴北日高南日下工不就緒其說有三洧人爲城計遇大水則壞防泄下以自保是閉口之無益一也鄆人爲利計遇興工則謀管延遲而苟完是修河之有害二也扶人則久占河身爲己田欲舍上流而別濬豈惟扶人鄆人之黠者尤甚此皆私便自圖害功之大者也爲今之計惟從決口順察水勢南北夾築護隄至汪家坡以下原河分定丈尺翻隄挑展務令堅實庶河濶足以受水隄厚不至于潰流矣爲民軫茲慮者尚

鑿之哉

梁之鯤曰按春岡先生此議就一時客水泛漲言之耳陵谷變遷時移勢易有不盡然者鄆之受害由于洧水橫溢其所以橫溢者由于無河之可歸也扶人築隄自防以鄆爲壑上下交壅欲塞無策欲疏無地徒費畚鍤以滋訟擾于是高侯親行原野審察形勢創開支河上流有水悉歸支河以分其勢正與前侯王時中初見相合至是水由地中行鄆民三十年來無漂沒之害而享耕鑿之利高

馬陽縣志 卷之三
侯之功真不在禹下矣

文水河在雙泊故道南七里河北自莊頭西入鄆境由古城西門入逕彭祖店南東游晉家橋毛家橋彪岡半截岡通丁家橋入扶界上自尉氏界下至扶溝界東西共四十九里

按邑北舊有雙泊河自洧川入鄆鄆受洧下流夏秋霖雨旬日則客水驟集水勢湍悍土壤輕脆易潰多成巨浸漂沒室廬而扶溝不受鄆之下流捍以橫堤鄆因數被水患萬歷間邑令高有聞躬行

詳視歎曰古有決河浚川而無隄防壅塞禹疏九河所以分其勢也是當別開支河以洩之乃于舊河之南另闢一河民心踊躍不日告成水勢既分遂無嚙決之患自河開後已未發南宮者五人因名文水河

又文河在縣西北係民間洩水渠康熙二十五年邑令黎可逢開上自洧川境夾岡潭起東逕油漢寺抵本境黃村店溫家潭窰子陂下達小北關河在本境計長十八里

七里河距縣七里故名上自洧川栗家口入鄆境西小岡東逕謝家坊古城前南由徐家坡七里橋馬貢莊胡家莊至鄭中丞塋前北入丁家橋河自水歸故道遂涸嘉靖八年知縣馮霄挑濬以祛水患康熙四十五年知縣李而侗復濬

三道河在縣西南二十里係民間洩水渠北道上自本境黃龍村陂起至本境閻段村入清流河止計長五十餘里中道上自本境所村西許州交界起下至本境屯溝西入清流河計長六十里南道上自本境明

義村西許州交界起下至本境五空橋入清流河計長六十餘里

按三道河自許州東秋湖流入境內河本三汉中夾支流並列三渠渠各有橋又東南合清流河順治十三年知縣經起鵬鳩工築隄旋以衝決

清流河在縣南四十里上接許州東秋湖流經鄆陵至西華界入潁河河在本境自錢家橋北起東逕順羊野岡劉家橋曹家橋橫石橋至周家橋東入西華界計長六十里

按舊志清流河卽潁水之別名源出新鄭大隗山東南逕長葛許州又東至臨潁縣入潁水經注云潁水東西潁水入焉是已今入沙河者卽此水然在本境惟隨水大小以爲盈涸非通津也
龔剛克曰清流河源本大隗山而今專言秋湖者以上所接故也至舊志云合于石梁之艾城河艾城係潁水下流卽今潁河之上源也現爲通津又據許州志秋湖潁水經其中潁水又名清流河鄢境想亦潁之故道耳

潁河舊志云在縣南六十里上流亦潁水自許州八里莊東逕麻糝橋水經云三河竒發不知果何源也

按潁河源三一出登封縣古陽城乾山一出少室山一出少室南溪東流受雙溪河水水出嵩山又受五渡溪水水出嵩山東谷又東入禹州西境受谷河水水出玲瓏山又東逕禹州北境受湧泉水水亦出玲瓏山受黑水河水水出張翁澗又東受中義河水水出大隗山又東入許州界經襄縣西北一名渚河又東過臨潁至鄢陵西華分界受潁

水渙水源出新鄭大隗山一名魯固河又名清流
河東逕長葛許州又名艾城河因魏鄧艾引渙水
屯田得名又東至鄆陵臨潁分界受石梁河水石
梁水出密縣山谷中東逕超化寺前滙爲黑白二
龍潭又東逕石固寨南有石橋爲許州長葛分界
流入臨潁東北境鄆陵界合渙水渙石二河合流
流至鄆陵西華分界歸潁河今名流潁河者以渙
水別名清流清流潁水合流故也又東逕陳州南
沈邱北抵歸德府鹿邑縣南而合于蔡河蔡卽賈

魯河又名惠民河沐河源出大周山 流潁河去
縣八十里上接艾城石梁二河入鄆潁二縣界南
由至張林橋轉東入鄆西二縣分界過麻粳橋東
合潁水卽渚河 逕倉頭村祁家堂東入西華境自河
上村至祁家堂計長四十餘里

又按潁河上源受水之多與洎水等查本境洎潁
二河寬不過六七丈焉能容上流無限之水是以
一經暴雨縣南扶濟新色陶城橫里一帶皆成澤
國縣北官莊七級彪岡楊河地方未有寧宇堵固

不可疏又不能此真守土者之隱憂也

十字河在縣西南形如十字元設閘以則水西營等處遺趾尚在今堙

玉帶河以兩渠環抱似帶圍也在城西南三十五里北渠起自許境清陽坡下入鄆界逕賢莊至常家寨東合南渠南渠起許境楊家寺坡下入鄆界逕許由寺羅寨至常家寨東合北渠二渠合注東由荆王塚歸三道河

絡江派自許州逕本縣栢梁寺南迤邐城西南隅過孝子岡入西華境史家湖漫入沙河相傳爲汨羅非蓋古泄水之渠其形聯絡故謂之絡江近年城南水患議者欲疏此惜哉因循無倡之者

蔡河故道 按浚儀王應麟紀聞云蔡河貫京師兼閔水洧水潁水以通陳潁之漕河南通志兼洧川自許田注鄆陵又云潁水注臨潁歷鄆陵合蔡凡許鄭諸水悉會設斗門以爲節入沙河今許田店北有遺迹一支經縣西栢梁橋迤邐東南杜郎村馬欄鎮河岡等處入西華境一支經縣西乾明寺前城東北隅入

扶溝曰河漕是為古蔡河又按水經注沙音蔡說文
正作沙音言水散石也從水從少水少沙見然則今
之所謂沙豈古之所謂蔡耶

陂溝

鄢南陂水經注云洧水又東鄢陵陂水注之水出鄢陵
南陂東西南流注於洧

鄢西北陂水經注云長明溝水與鄢陵陂雙導謂之雙
溝東南入沙水南與蔡澤陂水合水出鄢陵城西北
東西五里南北十里

蔡陂通志云隋開皇十六年分長葛許昌鄢陵三縣置
蔡陂大業二年廢者即此

陶陂水經云臨潁宣梁陂水東南入潁水又西南流逕

陶城西又東南逕陶陂以上舊志

臺子陂在彭祖店北

殷家陂在阮寨東

栗園陂在殷家陂東

紅溝陂在七級北

關蹬陂在紅溝陂北

楊河陂在丁家橋南

筐子陂在張坊莊前

汪家陂在党家岡東

太子陂見古蹟

鳳凰陂見古蹟

屯溝陂 在沙灘南

海紅溝在縣南十里許係洩水渠自本境楊家陂起至

郭家營東南入三道河計長二十五里

洩蓄溝在縣西南二十五里上自本境孫家莊前陂起

至岡周家莊入玉帶河長五里

盤溪溝在縣西南三十五里上自本境羅寨西坡起至

順羊村入清流河長八里

大浪溝在縣南四十五里係洩水渠自本境野岡坡起

至拐地角入西華界計長四十餘里

白湯溝在縣南七十里自本境新色村南坡起至橫里

村入西華界計長三十餘里

鯉魚溝自本境倉頭村西坡起至蔣家莊東入西華界

長十餘里

按舊志僅列陂四而溝不載今悉從續志補入雖

雨潦之後多滾成平地而形跡微存亦盡力溝洫

者所不廢也

隄防

雙泊堤在縣北自尉氏界起至扶溝界止長四十五里

按舊志隄一在縣北亘中牟洧川鄆陵築以防水
名雙洎隄一名長堤水經注云洧水自鄆陵東逕
桐邱南俗謂之天井陵今天井岡卽是西南去許
昌故城三十五里卽長堤乃洧水之北防也
流潁河堤自張林橋起至祁家堂止長二千一百九十
丈南岸界西華北岸界鄆陵時值氾濫兩岸齊決滄
民田不下千頃乾隆十三年知縣張澗將北岸築堤
一道寬三丈高一丈二尺連年水發鄆不爲患

湖潭

西湖在榮樂門外劉訥曰宋尚書崔立引城北蔡河水
爲亭二曰葆光曰西亭見韓魏公詩文蔡卽宋漕通
雙洎楊侃皇畿賦曰潺潺洎溝渙渙洧水入鄆陵而
碧截原田過扶亭而清映閭里此湖襟帶其間尤當
時勝槩舊志謂元人作非
温家潭在縣西北十八里居民多温姓因名係洧川下
流接文水河淵水澄深雖大旱不涸

橋梁

東門弔橋 乾隆四年水冲舊橋邑人蘇元炳馮瓚等募建石橋三空六年復冲兩翅炳等又建兩空

西門弔橋 乾隆四年水冲舊橋邑人張子貴捐修木橋一座六年復冲貴又同姪張宗禹生員劉友

蓮等募建石橋三空九年知縣姜縮修二十八年知縣陳子檜重修

北門弔橋 原建木橋乾隆三十六年知縣施誠改建石橋

七里橋 在縣北跨七里河知縣焦玪建今廢 惠民橋 在縣北跨雙泊河邑人曹瀛修今廢

文水橋 在惠民橋南知縣高有聞修邑人韓程愈重修今廢

丁家橋 在縣東北十八里跨雙泊河 栢梁橋 在縣西十里通許州今廢

彭祖店橋 在縣北二十里跨雙泊河 永濟橋 在南門外偏西邑人秦岡等建今廢

[Faint bleed-through text from the reverse side of the page]

曹家橋

在縣南三十五里跨清流河

五空橋

在縣南三十五里跨清流河

馬家橋

在縣西十五里今廢

五里溝橋

在縣南邑人程天錫建今廢

錢家橋

在縣西南四十里跨清流河

劉家橋

在縣西南四十里跨清流河

橫石橋

在縣南五十里跨清流河

張林橋

在縣西南七十里跨清流河

麻糲橋

在縣南八十里跨流潁河

通濟橋

在縣南五十里跨清流河今廢

劉潁河橋

在縣南三十里今廢

三道河橋

在縣南二十里今廢

